



## बर' समाजाव सोलिबोनाय मोदाइ-दावदाइनि सोमोन्दै सुबुं फोथायनाय (Folk beliefs of the Bodos about the Gods and Goddesses)

रिता बर' पि.एइच.डि.

टंला फरायसालिमा, टंला, अदालगुरि, बि.टि.आर., आसाम

### गुबै बाथ्रा

सुबुं फोथायनाया दान्थे-बिदान्थेखौ गनायथिया; नाथाय बेयो गोदो-गोदाइनिफ्राय सोलिबोनाय दोरोंखौ फोथायो। खायफा बिजिरगिरिफोरा सुबुं फोथायनायाव सोरांनि जेबो सिमना थाया होनना बुंदोंब्लाबो बे फोथायनायाव सुबुंनि गियान, आब्रुथि, सिबिनाय - बेफोरनि फुंखाखौ हाबना थानाय नुनो मोनो। गाहाइयै बर'फोरा गोदोनिफ्रायनो दिनैसिम बोराइ बाथौखौ सिबिबोदों। अब्लाबो नुनो मोनोदि गामि गोथौवाव रायजो जानाय खायफा बर'फोरा दाबो गोबां मोदाइ-दावदाइखौ फोथायबोदों आरो सिबिबोदों। बे मोदाइ-दावदाइफोरखौ मानसिफोरा बायदि रोखोमनि बेराम-आजार जायोब्ला बायदि बावथाइजों गावनि बिमारावजोंबो रायसंनानै फुजिबोदों। बेफोर फोथायनाय आरो सिबिनाया बर' समाजाव हिन्दु मोदाइ-मोदाइजोफोरनिफ्राय जायगा मोनदों होनना रेभारेण्ड सिडनी एण्डेला (1997) बुंलांदों। बेल' नडा, बिथाडा बेफोर मोदाइ-दावदाइफोरखौ फुजिनायखौ नायनानै बर'फोरखौ animistic होननाबो बुंदों (एण्डेल 1997: 33)। नाथाय बेफोरखौ गोथौवै बिजिरना नायोब्ला बर'फोरा गाव हारिँ दोरों-हारिमु दोहोरोम गोनां थागिबि हारि बेखौ हमनो हायो।

बर'फोरा गोदो-गोदाइनिफ्राय सिबिबोनाय माखासे मोदाइ-दावदाइफोरा जाबाय आइ मोदाइ, दैनै मोदाइ, हाग्रा मोदाइ, खेथ्र' मोदाइ, सिखाव मोदाइ आरो गोबां। फारसेथिँ, बेफोर मोदाइ-दावदाइ सिबिनायानो बर'फोरा आबादनि सायाव सोनारग्रा मिथिँगानि बिखायाव रायजो जानाय सुबुं हारि बेखौ फोरमान खालामो।

बे संजिरलाइनि थांखियानो जाबाय बर'फोरनि मोदाइ-दावदाइ फोथायनाय सोमोन्दै नायबिजिरनाय। नुनो मोनोदि, आथिख्रालनि गोदानारि साननाय-हनायाव बेफोर फोथायनाया जेबो खाब गैयाबादि अब्लाबो बेफोर फोथायनायजों मोनसे हारिनि सुबुं थुनलाइफोरा हाबना

थायो। बेखायनो बेफोरखौ इयुन जोलैनो सिनायथि खालामना होनाय लोगोसे गोजामखौ बुरखानाय - बेफोरनो बे संजिरलाइनि थांखि आरो नोजोर।

**मादा सोदोब :** बर' समाज; मोदाइ-दावदाइ; सुबुं फोथायनाय; खुबेर

## 1. जागायनाय

सुबुं जिउनि दोरों आरो रंगौथिया सुबुं फोथायनाय सोमजिहोयो। सुबुं फोथायनाया दान्थे-बिदान्थेखौ गनायथिया; नाथाय दोरोंखौ गनायथियो। (गौ 2008: 1)। सार्लस् दारउइना बुंदोंमोन दान्थे-बिन्दान्थेनिखुइ जोनोमाव मोनबोनाय आखुवा गोबां गोहो गोरसिन। सुबुं फोथायनायाव बे बाश्राया गोरबो। गोजाम समाजानो जा एबा गोदान समाजानो जा दोहोरमनि गाहाइ बिथायानो जाबाय सुबुं फोथायनाय आरो आसार-खान्थि बायदि फालिनाय।

सुबुं फोथायनायनि जाहोनफोरखौ फंसे बाश्राजों फोरमायनो हाया। बे सुबुं फोथायनाया गोदो-गोदाइ सुबुं समाजनिफ्रायनो सोलिबोदों। बे बेलायाव वेलेण्ड डि. हेन्डनि (Wayland D. Hand) बादिब्ला सुबुं फोथायनायनि फुंखाया बान गैयि फोथायनाय। सरासनस्रायै जाय समाजनि गोसोआरि सोरांनि सिमनाया रुजुथाइयारि रोखोमै गुसेब आरो साननाय-हनायनि सिमनाया गुसेब बिदि समाजावसो सुबुं फोथायनाय एबा खोमसि फोथायनाय बादिनि मावथाय फिनजाथाइ थायो होनना बुंनाय जायो। नाथाय सुबुं फोथायनायावदि सोरांनि जेबो सिमना थाया बेबो नड। माखासे सुबुं फोथायनायफोरजों सुबुंनि गियान, रंगोथि, आब्रुथि, सिबिनाय बेफोरनि फुंखाबो हाबना थायो।

बर' समाजाव गोबां सुबुं फोथायनायखौ मोन्नो हायो जाय सुबुं फोथायनायफोरानो बर फोरनि दोरों आरो दोहोरमजों सोमोन्दो दं। लोगोसे बिफोरनो बर फोरखौ मोनसे आब्रुथि गोनां हारि हिसाबै बो गायसन बोदों। गाहाइयै बर'फोरा बाथौ दोहोरमारिब्लाबो बर समाजाव मोदाइ-दावदाइखौ लाना माखासे फोथाय बोनायखौ नुनो मोनो। बेफोरखौ गाहाइयै गामि ओन्सोलाव रायजो जानाय बर'फोरा आथिखालावबो मानिबोनायखौ नुनो मोनो। बे संजिरलाइयाव गाहाइयै बर' समाजाव फोथायबोनाय मोदाइ-दावदाइफोरनि सायाव सावरायनाय जागोन।

## 2. थांखि

मोनसे समाज एबा हारिनि गुदिथिखौ नायबिजिरनो बे समाजाव थानाय मोनफा-मोनफा आसार-खान्थि फोथायनायफोरखौ नायबिजिरनो गोनां जायो। बे संजिरलाइयावबो गाहायाव होनाय थांखिफोरखौ सिगाडाव लानानै थियारि खालामनाय जादों-

1. बर' समाजाव जायगा मोननाय मोदाइ-दावदाइफोरखौ सावरायनाय।
2. समाजाव बेनि गोनांथि।
3. बे मोदाइ-दावदाइफोरहा बर' समाजजों मा सोमोन्दो दं?
4. मोदाइ-दावदाइफोरनि सोमोन्दै गोदान जोलैनो सिनायथि खालामना होनाय।

### 3. सावरायनायनि आवथा

बि.टि.सि. ओन्सोलनि अनगायैबो आसामनि गुबुन गुबुन जायगायाव बर'फोरा रायजो जानानै दं। बे गुवार जायगानि बर'फोरनि मोदाइ-दावदाइ फोथायनायखौ लाबोजोबनो हानाया बे सुंद' संजिरलाइयाव जाथाव नड। बेखायनो बे संजिरलाइयाव गोदोनि बोखावजायै दरं आरो आथिखालनि अदालगुरि जिल्लानि सिडाव थानाय गामिफोरखौ नायबिजिरना बे संजिरलाइखौ थियारि खालामनाय जादों।

### 4. सिगांग्रो सानमिजिं

मोनफ्रोमबो आयदा सावरायोब्ला बेनिफ्राय जों माबा मोनसे फिथाइखौ आसा खालामो। बे माबा मोनसे फिथाइ होनो हायोब्लासो सावरायनायनि थांखिया जाफुडो। बे आयदाखौ फोरमान खलामनो थाखाय गाहायाव होनाय सिगांग्रो सानमिजिंफोरखौ लानाय जाबाय।

1. बर' समाजाव गोदो-गोदाइनिफ्राय फोथायबोनाय मोदाइ-दावदाइ सिबिनाय एबा फोथायनायनि आन्दोआव बायदि रोखोमनि सावगारि हाबना दं।

2. समनि बोहैथि दाहाराव बेफोर मोदाइ-दावदाइ सिबिनाय एबा फोथायनाया गोमालानो हमबाय।

3. दानि इयुन जोलैफोरा बेनि फारसे मिथिनो गोसो गैलिया।

### 5. खारि जथायनाय खान्थि

बे संजिरलाइनि खारिथि बुथुमनायनि गिबि खारिथि हिसाबै टंला ओन्सोलनि गंभ्रेसो गामिखौ थावनि फरायसंनाय हिसाबै लानाय जादों। मेथाइ, मोन्थोर बादिखौ मिथिनो थाखाय गामियाव थांनाने बैसो जानाय सुबुंफोरखौ मोगा-मोगि लानाय जादों। लोगोसे गामियाव खुंनाय फुजा फोर्बोफोराव बाहागो लानानै बिजिरनाय जादों। फारसेथिं, नैथि खारिथि हिसाबै नांगौबादि हेफाजाब, बिजाब सावराय बिजाबफोरखौ लानाय जादों।

### 6. थुनलाइनि बिसावरायथि

बर' समाजनि आसार-खान्थि, सुबुं फोथायनाय, हारिमु बायदि बिथिंखौ लानानै आथिखालसिम गोबां सावरायगिरिफोरा सावरायलांबाय। भबेन नार्जिनि बर' समाज आरो हारिमु बे बिजाबाव बर'फोरनि आसार-खान्थि, दोहोरोम गासै बिथिंखौनो सावरायनाय नुनो मोनो। बर'नि माखासे मोदाइफोरनि सोमोन्दै सावरायनाय नुनो मोनो। नाथाय दाबो दरं ओन्सोलाव फोथायनाय मोदाइ-दावदाइफोरनि सोमोन्दै गुवारै सावरायनाय नुनो मोनाखै। बेयाव अदालगुरि ओन्सोलाव फोथायबोनाय मोदाइ-दावदाइफोरनि सायाव नोजोर होना सावरायनो नाजानय जागोन।

## 7. सावरायनाय

बर'फोरा अबं गसाइखौ गोदो-गोदाय आजै-आजौनिफ्रायनो सिजौ बिफां गायनानै बाथौ अदेबानि बोराइ बाथौ महरै फुजिबोदों। गोबां गेदेमाफोरा बोराइ बाथौखौ शिबजों रोखोमसे होनना बुंनो नागिरब्लाबो बाथौ दोहोरोमारिफोरा बाथौ आरो शिबखौ गुबुन होनना बुंदों।

आथिखालाव बर'फोरा बाथौखौ बिबार-गाजिजों फुजिदोंब्लाबो नाथाय बै समनि बर'फोरा बाथौ बिथानि एसे खाथियाव दाउ, हांसो, फारौ-बोरमा बायदि बोलि होना फुजिबोदोंमोन। बेनि फोरमानखौ दरनि राजबंशबलीयावबो मोननो हायो। मानोना हिन्दु खान्थिजों जनजातीयफोरा फुजिनायखौ महादेबा मोजां मोनाखैमोन-

‘आपनार नीति एरिलिहि किय॥  
कुछारीर मते एभ करिया नाचन।  
तर जय हैब केल स्वरुप बचन॥’

बर'फोरा बोराइ बाथौखौ गोदो-गोदायनिफ्राय सिबिबोदोंमोनब्ला बेजों लोगोसे माखासे मोदाइ-दावदाइखौ माब्लानिफ्राय सिबिबोनाय बे फोरमानखौ रोखा मोननो हाया। रेभारेण्ड सिडनी एण्डेला बिदि मोदाइ-दावदाइखौ *Village Deities* होनना बुंदों। जानो हागौ, बर'फोरा जायखिजाया नुमोनि गोहोखौ मोदाइ एबा देवतानि गोहो होनना बुंदोंमोन। बिसोरो मोदाइखौ ननि मोदाइ आरो बायजोनि मोदाइ होनना मोननै बाहागो खालामदोंमोन। मोदाइनि सोमोन्दै रेभारेण्ड सिडनी एण्डेला ओरैबादि बुंदों- In the typical Kachari village as a rule neither idol nor place of worship is to be found; but to the kachari mind and imagination earth, air and sky are alike peopled with a vast number of invisible spritual beings, known usually as "Modai" all possessing powers and faculties far greater than those of man, and almost invariably inclined to use these powers for malignant and malevolent, rather than be nevolent, purposes. (Endle 1997: 33).

बै समाव बर'फोरा सोरहाबा माबा मोनसे बेराम-आजार जायोब्ला ‘मोदाइ हमदों’ होनना बुडोमोन। बेबादि बेराम-आजार, लोमजानाय-साजानायखौ फाहामनो थाखाय, बिबार, सबाइ गोरान, माइरं, गय-फाथैजों बानायनाय गाजि (प्रसाद) बावथाइखौ गांसे लाइजौ लाइयाव लानानै लोमजानाय मानसिनि मुं लाना नोजोर होनाय मोदाइनि मुंखौ रायसंनानै गावनि बिमारावजों रायसंलाडो। मोन्थोर रायनाया जोबब्ला लाइजौनि गासै बावथाइखौ थफ्ला बोनथुमना ननि मुदा एबा खामसालिनि उखुमफोराव थेबदावना दोनोमोन। बेखौ बर' रावाव ‘सथा’ होनना बुडोमोन। बावथाइ होनोब्ला बेयाव जार्मान बिबार, गय बिनथु, हाग्रानि फाथैफोरानो गाहाइमोन। मोदाइलाय मोदाइ दाउदै, दाउ बायदिबो होनांगौमोन। दाउदैनै मुडाव गुफुर फान्थाउ होब्लाबो जायोमोन। रां गरसे होनांगौब्ला रां गैयाब्ला दैहु बायनायफोरखौ (देगावर्ले होनना बुडो) होब्लाबो जायो मोन। गिबियाव बबे मोदाइया हमदों बेखौ नायखांना लानाय जायोमोन। बेखौ खावरि नायनाय होनना बुडोमोन। खावरि गैयाब्ला गरगु माइरं लानानैबो नायखाडोमोन। बेफोरो जेन बर'फोरनि

मोनफा-मोनफा गिबि फाहामथाइ बादिमोन। बिदि खालामनायावबो हामाब्ला गेदेरहै फुजा-फाथाल होनाय जायोमोन।

### 7.1 मोदाइ-दावदाइनि मुं

बर'फोरनि सुबुं फोथायनायाव आजै-आजौनिफ्राय आथिखालसिम जायगा मोननाय मोदाइ-दावदाइफोरनि मुडा जाबाय दैनि मोदाइ, आइ मोदाइ, हाग्रा मोदाइ, खेथ्र' मोदाइ, हाराइ मोदाइ, गपाल मोदाइ, सिखाव मोदाइ; जगन्नाथ मोदाइ, खुबेर मोदाइ, बायदि बायदि।

फारसेथिं रेभारेण्ड सिडनी एण्डेला *The kacharis* बिजाबाव साजि मोदाइ-दावदाइनि मुंखौ मख'दों। बिसोर जाबाय मेरु राजा, बोराइ महादेब, बोराइ गसाइ, जल खुबेर, थल खुबेर, आइ खुबेर, बिस खुबेर, खुबेर ब्राइ, खुबेर बुरै, सिलाराय।

### 7.2 फुजा खालामनाय नेम-खान्थि

बर' कसारिफोरा मुलुगनि जिब-जिबि खांग्रा-फालिग्राखौ बिमा आइ गियानजों फुजा खालामो, सासान खुंग्राखौ बिफा गियानजों फुजियो। बे हौवा-हिन्जाउ सानै मोदाइ-मोदाइजोखौ बिसोर आदि पुरुष स्वयं महादेब आरो मिथिंगा आइ कामाख्या होनना फोथायो। बिसोरनि अननायावनो मुलुग संसारनि जिबिफोरा थानानै दं। (नार्जी 1995: 220)।

### 7.3 आइ मोदाइ

आइ एबा बसन्त आँखारोब्ला शीतला आइखौ सिबिनानै आइनाम रोजाबोब्लानो बेरामा मोजां जायो होनना फोथायनाय जायो। (शर्मा 1992: 20)। बे फुजानि थाखाय गोनां जानाय बावथाइफोरा जाबाय (क) थालिर लाइजौ गांधाम, (ख) हांसो बिदै जराथाम, (ग) गय-फाथै जराथाम, (घ ) आलारि बाथि जराथाम, (ङ) गुफुर आरो गोजा बिबार, (च) थुलुंसि बिलाइ, माइरं, गय-फाथैजों बानायनाय गाजि, (छ) धुप-धुना आरो दै गोथार।

गासैबो बावथाइखौ थियारि खालामनानै लाइजौवाव दोन्नानै सानजा मोखां जानानै गाहायाव होनाय मोन्थोरखौ रायसंनंगौ-

एहेम परमस्वर, प्रभु नै आमुखिनि मुडाव

रायसंदों प्रभु

आइ महा-माया दंथ' परमस्वर प्रभु सोर्जिगिरि बिमा सोर्जिगिरि आइ

नोंसोरनो गेदेर नोंसोरनो गोलाव

माननि थाइयाव मानाव थानांगौ

गय जरा फार्थे जरा  
दाउदै जरा होनानै  
राइसनना दोनबाय परमस्वर प्रभु  
दिनैनिफ्राइ मान्ति जानांगोन  
जाखिनि होगोन होनना  
गासैखौबो राइसन्नानै दिनै  
मान्ति जादों परमस्वर प्रभु  
निमाहानिगिरि निमाहा होनांगोन प्रभु  
राहानिगिरि राहा होनांगोन  
नोंसोरनो बिमा गखानि  
सोरजिगिरि आइ जानानै दिनै रैखा खामदो फिसाखौ  
हाउग्रि बुरै दं थ' प्रभु  
लेजा बोराइ दं थ' परमस्वर प्रभु  
धन खुबेर दं थ' प्रभु  
काला खुबेर दं थ' प्रभु  
एहेम नोंसोरनो  
निमाहानि गिरि निमाहा होनांगोन  
राहानि गिरि राहा होनांगोन प्रभु  
जलमातृ, जल आइ, जल खुंग्रि  
नोंसोरनो गेदेर नोंसोरनो गोलाव  
माननि थाइयाव मानाव थानांगौ आइ  
परमस्वर प्रभु  
नोंसोरनि समान गेदेर गोलाव  
गैया परमस्वर प्रभु  
थिस थिसा इब इब खालामनायखौ  
नोंसोर दिनैनिफ्राय राहा खालामदो परमस्वर प्रभु  
नै आइ अमुखानि मुडाव दिनै-  
गय जरा फार्थे जरा  
गासैखौबो बावथाइ होनानै  
रायसंनानै दोनबाय प्रभु  
एहेम परमस्वर प्रभु।

(होग्रा: 'उमलाउ बर' (45), सस्त्रपारा बाथाबारि)।

बेनि उनाव गाजि प्रसाद सोमनाय दैखौ आखाइयाव लाना लोमजानायनि मोदोमाव खर'निफ्राय आर्थिसिम फोनना होनांगौ मोन्थोर रायनाया जोबब्ला गंसे बोराइ सान्द्रि एबा दालायाव दैखाना मोजां जायगायाव आवथायना दोननांगौ। लोगोसे बेयाव सानथाम नाडै आलारि फोजोना खुलुमनांगौ आरो सानजौफु मोनानि संनाय गोथार ओखाम ओखिखौ बावनो नांगौ।

#### 7.4 दैनि मोदाइ

बे मोदाइखौ दैमा एबा दैयाव थायो होनना फोथायनाय जायो। दैमानि सायाव बायदि रोखोमनि अनागार, माब्लाबा दैमायाव ना हमनायाव, दुगैनायाव खिब्ला-हासुब्ला, सानजौफु-मोनाबिलि समाव दैमा बारोब्ला बै मानसिनि सायाव गाजि नोजोर गोलैयो होनना बर'फोरा गोदोनिफ्रायनो फोथायबोदों। दै मोदाइनि गाजि नोजोर गोलैब्ला मानसिनि आथिडा बुखाडो, गोजाडो एबा जायखिजाया बेराम जानो हागौ होनना फोथायो।

#### 7.5 फुजा खालामनायनि नेम-खान्थि

हांसो बिदै जरासे, बाक्सा माइरं एसे, थुलंसि बिलाइ, गय-फाथै जरासे, गाजि एबा प्रसाद, गांसे लाइजौ, सिन्दुर, धुप-आलारि बाथि, फैसा थाइसे होनानै लोमजानाय सुबुंनि मुं लाना गासै गोरान्थिफोरनि निमाहा बिना जा आइ मोदाइ रायसंनाय मोन्थोरखौनो रायसंनानै गासै बावथाइफोरखौ दै मोदाइनि सेराव बावनंगौ। बिनि बावथाइखौ उखुम मुदायाव थेबना दोननांगौ। बेनि सोलायै दै मोदाइ होब्ला बेरामि एबा बेरामि नखरनि सोरबा सासे मानसिया जायखिजाया न' सेरनि दैमा गंसेनि गाथोन सेराव मोजाडै दुगैयै-लोबै खना फारसेयाव गय फाथै बायदि बिबारनि बावथाइजों लाइजौ लाइयाव फुजा बावनो नांगौ। बे फुजायाव लाइजौ गांसेयाव गंसे फिसा औवा जेंसि थुना औवा बिजौवाव दोसे खुन्दुडाव माला सुना खाना होनांगौ। नोजोर होनांगौदि बिबारनि मालाया दैयाव नानानै थायो।

#### 7.6 हाग्रा मोदाइ

ननि खाथि-खाला थानाय हाग्रायाव रायजो खुंनाय मोदाइखौ 'हाग्रा मोदाइ' होनना बुंनाय जायो। हाग्रा मोदाइया नोजोर होब्ला गोजानाय, गोबानाय, मोदोम सानाय, खर' सानाय जायो होनना फोथायो बेरामिया सानाय आरो गोबानाय बायदियाव थानो हायै जायो।

#### 7.6.1 हाग्रा मोदाइ फुजिनायनि नेमफोर

थाइसे हानि दैहु, दाउ मासे, दाउदै दैसे (दाउदै गैयाब्ला फान्थाउ गुफुर थाइसे एबा एमाव थाइसे) इन्दि बिफांजों बानायनाय सिफुं गंसे, थालिर बिलाइजों बानायनाय खसाब जरासे (जामा होनना बुडो बे जामाखौ दैहुवाव गानहोनांगौ), गय-फाथै, माइरं-दालि बायदिजों बानायनाय गाजि, थाखा थाइसे बेफोर गासैखौबो

सिथ्लानि सानजा खनायाव लिरस्रोना लानाय जायगायाव बावनांगौ। बेनि उनाव दै गोथार लाना गाहायाव होनाय मोन्थोरखौ रायसंनांगौ-

**अजा:** ऐ आबौ, ऐ आबै  
नोंसोरलाय माथो थिनथाला थिनथाला  
बायदिसिना खालामलायबाय थायोलै  
ऐ दिनैनिफ्राय गारगोनना गारा नोंसोरलाय?

**हाग्रा मोदाइ (अजाया गावनो):**  
गारगोनलै आबौ गारगोन

**अजा:** सयत' गारमारगोनना नोंसोरो?

**हाग्रा मोदाइ:** सयत' गारगोनलै आबौ।

**अजा:** गारमारगोन थ?

**हाग्रा मोदाइ:** सयत' गारमारगोन।

**अजा:** ऐ परमस्वर प्रभु हाग्रा मोदाइ  
थिस थिसा इब इब जिब-जिबि  
सिंदाल' गोबाल' खामनायखौ  
गारगोन होन्नानै बुंदोमोन परमस्वर प्रभु  
निमाहा होनांगोन परमस्वर प्रभु  
महाबा थांनायाव महाबा थानायाव  
खिला हासुला खामनायखौ  
ऐ आबौ ऐ आबै  
आमुक आमिखौ सिंदाल' गोबाल'  
खामनायखौ गारगोनथ' नोंसोरो?

**हाग्रा मोदाइ:** सयत' गारमारगोन।

**अजा:** सयत' गारमारगोन ना?

**हाग्रा मोदाइ:** अलै आबौ गारमारगोन



**अजा:** एहेम परमस्वर प्रभु  
गय जरा फाथै जरा होनानै  
दाउदै-दैसे होनानै  
रायसंदों परमस्वर प्रभु  
खर' सानाय आर्थि सानाय  
दिनै स्रांलांगोन होन्नानै  
बुंदोंमोन परमस्वर प्रभु  
एहेम नै दिनै आमुखा-आमुखिनि मुडाव रायसंना दोनबाय प्रभु  
एहेम परमस्वर प्रभु।

(होग्रा: 'उमलाउ बर' (45), सस्त्रपारा बाथाबारि)।

बेबादि फुजा रायसंनायखौ फोजोबना बावथाइफोरखौ दैहुवाव सोना न'नि उनजों एबा बाख्रिनि उनजों मोजाडै दैखांना दोननांगौ।

### 7.7 खेथ्र' मोदाइ

बर' कसारिफोरा फोथायोदि मोदाइ-मोदाइजोनि गाज्रि नोजोराव मानसिनि मोदोमाव खेथ्र'वा साफियो। उनाव बै मानसिया बायदि रोखोमनि बेरामाव गोग्लैना जिउबो खोमानो गोनां जायो। खेथ्र'वा मोननाय मानसिया हराव उन्दुब्ला सिमाडाव मैदेर, मोसा, मुफुरफोरा होसोनाय नुयो एबा अखाडाव बिस्बायर्थिनाय एबा हाग्रा गेजेराव थांना लामा गोमाजानानै आलाय-सिलाय जालाडो। फारसेथिं खेथ्र'वा मोननाय मानसिनि सरासनस्रा सावस्त्रिनिफ्राय देहाया गाज्रि जालाडो। मानसिया थै गैयि जालाडो। खेथ्र'वा सरासनस्रायै गोलै गथ' एबा मोदोमाव थानाय आयजोनि मोदोमाव बायो होनना फोथायो। (नार्जी 1995: 222)।

बर' कसारिफोरनि बादिब्ला मोनबा रोखोमनि खेथ्र' दं होनना भबेन नार्जीया मख'दों। बैफोर जाबाय (क) दाबा मात्रि, (ख) मोदोम बुगारनाय, (ग) दै खेथ्र', (घ) उपायस्त्री खेथ्र', आरो (ङ) मोसा सोदोब।

#### 7.7.1 दाबा खेथ्र'

बर'फोरा फोथायोदि थाम बोसोरनि गेजेरनि गथ'फोरनि मोदोमाव बे खेथ्र'वा साफियो। बेखायनो बिदि खेथ्र' बानाय गथ'फोरखौ 28 घन्टानि गेजेराव खेथ्र' मोदाइखौ फुजा खालामना दावाइ दौवाब्ला बेरामिया थैनोबो हागौ होनना फोथायो।

#### 7.7.2 मोदोम बुगारनाय खेथ्र'

बे खेथ्र'वा हमोब्ला मानसिनि मोदोम, आखाइ-आर्थिफोरा गेदेरहै बुगायो होनना फोथायो मानसिहा थै अर गैया जाना जोबथायाव थैनोबो हागौ। बेखायनो थाबैनो खेथ्र'खौ फुजिनो दावाइ दौनांगौ होनना बुडो।

### 7.7.3 दैनि खेथ्र'

बे खेथ्र'वा दैयाव थायो होनना फोथायो दैनि खेथ्र'वा साफियोब्ला बेरामिआ आखाइ-आथि, मोदोम बुगायो होनना फोथायो।

### 7.7.4 मोसा सोदोब (बाघनीशर)

मोसा सोदोब खेथ्र'खौ गथ' जोनोम जानो गोनां बिमानि थाखाय गिथावना होनना फोथायनाय जायो। सोरबा आयजोआ गथ' जोनोम जानायनि उनावनो खेथ्र'वा हमो। बेरामिया मोसाबादि रोनावनानै गैयै जाना गोम्लैलानायनि थाखाय बे बेरामखौ मोसा सोदोब एबा बा (बाघनीशर) होनना बुडो खेथ्र' मोदाइखौ फुजा-फाथाल होनानै फिथोब एबा माबेबा थाबसियाव, फानसाखु सोना गानहोब्ला बे बेरामा गायो होनना फोथायो।

मख'जाथावदि अदालगुरि जिलानि टंला थानानि सिडाव थानाय बर' कसारिफोरा खेथ्र' फुजा खालामनाय नेम-खान्थिफोरा गुबुन ओन्सोलफोरनिखुइ इसे आलादा होनजायो। बे ओन्सोलनि बर'फोरा खेथ्र' मोदाइखौ मोननै बाहागोआव रानदों। मोनसेया जाबाय 'साथो खेथ्र'' आरो गुबुन मोनसेया जाबाय 'जल' एबा दैनि खेथ्र'। साथो खेथ्र'खौ बोरियाव थायो आरो दै एबा जल खेथ्र'खौ दैयाव थायो होनना बुडो। साथो खेथ्र'वा साफियोब्ला उन्दै गथ'फोरा गिनानै गिखंबाय थायो होनना फोथायो।

### 7.7.5 खेथ्र' फुजा खालामनायनि जा-जगार

खेथ्र' फुजानि थाखाय गोनां जानाय मुवाफोरा जाबाय- जिगाबजों बानायनाय मानसिनि मुसुखा, गंसे फिसा दाबा, मुसुखानो गानहोनो खसाब, आ-अलंकार, गाजि प्रसाद, सिन्दुर, हांगार थुखासे, गय जरासे, गोसोम दाउजो मासे, दाउ दै जरासे, थुपि आरो लावथि गंसे, लाइजौ, थाखा थायसे, बेफोर गासैबो मुवा-बेसादफोरखौ जगार खालामखांना सानजा खोलार्थिजाय सिथ्लाखौ एसे लिरस्रोना लानानै लाइजौखौ बनानै बेयाव सिन्दुर आरो हांगारजों मानसिनि नक्सा आखिना लानांगौ। बेनि उनाव लाइजौवाव गासैबो जगार खालामना लानाय बावथाइफोरखौ बावनांगौ। लोगोसे मुसुखाखौ फज'ना थुपिखौ गानहोना लावथिखौ होनांगौ। बेनि उनाव अजाया दै गोथार सारना गाहायाव होनाय मोन्थोरखौ रायसंलानांगौ-

एहेम परमेस्वर प्रभु

साथो खेथ्र' प्रभु

नोंसोरनो गेदेर नोंसोरनो गोलाव

गय जरा फाथै जरा होना

रायसंदों परमस्वर प्रभु

दिनै आमुखाया महाबा थांनायाव

महाबा थानायाव खिला हासुला खामनायाव  
साथो खेथ्र'वा रागा जोबाय  
नै बेनि थाखाय नोनो गासैबो बावथाइजों  
रायसंबाय प्रभु आमुखाखौ रैखा खामदों  
परमस्वर प्रभु ...  
एहेम हे इस्वर ...।

(होग्रा: मुस्त्रिमा सावखि बर' (75), सस्त्रपारा बाथाबारि)।

### 7.7.6 दैनि खेथ्र'

दैनि खेथ्र'खौ सरासनस्त्रा रोखोमै फुजा होब्लाबो जायो बे फुजानि थाखाय गोनांथि जानाय मुवा-बेसादफोरा जाबाय- हांसो बिदै जरासे, गय-फाथै जरासे, गाजि-प्रसाद, बिबार, सिन्दुर, थाखा गरसे। बेफोर गासैबो मुवाफोरखौ गांसे लाइजौवाव लानानै सानजा मोखां जानानै दै खेथ्रनि मुं लाना रायसंलांनांगौ आरो जोबथायाव लाइजौनि बावथाइफोरखौ बोनथुमनानै बबेबा बारि खनायाव दोनहैनांगौ।

बर'फोरनि सुबुं फोथायनाय बादिब्ला खेथ्र'वा मोजां मोदाइ नडा। बेखायनो खेथ्र' मोदाइखौ रायसंना दैखांना दोननायनि उनाव बिखौ थाबनो बिदाइ एबा हगारनांगौ जायो। बे मोदाइनि बिदाइ होनायनि नेम-खान्थियाबो एसे आलादा।

### 7.7.7 खेथ्र' हगारनायनि जा-जगारफोर

खेथ्र' बिदाइ होनायनि गोनां जानाय मुवाफोर-

1. राम फारौ मासे; राम फारौ गैयाब्ला बेनि सोलायै सुडा बादालि होनाय जायो।
2. बिलाथि गराइनि दिन्थि महरबादि मासे मौला (तेजपिया)।
3. अमानि दिन्थि महर बादि एमबु सिथ्र मासे।
4. गाजि-प्रसाद, लाइजौ, गय-फाथै, थाखा गरसे, बिबार, बायदि बायदि।

बेफोर गासैबो मुवा-बेसादफोरखौ एबा बावथाइफोरखौ थालिर बिलाइयाव होनानै खेथ्र' मोदाइनि सिगांनि बावना दोननाय गासैखौबो लोगोसे दोन्नानै साथो खेथ्र'नि मुं लाना गाहायाव होनाय मोन्थोरखौ रायसंनांगौ-

नै साथो खेथ्र' जल खेथ्र'  
परमस्वर प्रभु

नोंसोरनो गेदेर नोंसोरनो गोलाव  
गय जरा फार्थे जरा,  
दाउ अमा गराय होना  
नोंसोरखौ दिनैनिफ्राय बिदाइ होबाय प्रभु  
एहेम परमेस्वर प्रभु ...।

मख'जाथावदि खेथ्र' मोदाइखौ जेब्ला माबेबा मोनसे जायगायाव हगारनो थाडे अब्ला फुजायाव बावनाय सुडा बादालि, तेजपिया आरो सथ्र एम्बु बेफोरखौ गोथाडै दोंफा दोंफा दिरुंजों खानानै बोयै बोयै लानो नांगौ। खेथ्र' मोदाइखौ माबेबा बाखोर एबा हाग्रा ओन्सोलाव लाना थांनाय सिगांनो अजाया गावनि जानाय-लॉनायनि खामानिफोरखौ फोजोबना लानांगौ। मानोना बियो आरो फिन बै न 'वाब हाबनो मोना। लोगोसे खेथ्र' हगारनो थांनाय समाव न'खरा अजानो गय-फार्थे खावनानै, बिरि-सादानि जगारबो खालामना हरखायो। अजाया लामायाव लोगो मोननाय मानसिनो बेफोरखौ रानै-रानै होलां नांगौ।

### 7.8. गपाल मोदाइ

न'खरनि आबाद मावनाय मोसौ हालिया थैना थाबोला एबा नखरनि मोसौ हालिनि मोजां सावस्त्रि हास्थायनानै बे फुजाखौ खालामनाय जायो। फुजानि थाखाय गोनांथि जानाय बेसादफोरा जाबाय थालिर आखासे, गाजि-प्रसाद, फिथाइ-सामथाइ, धुप-धुना, आलारि बाथि, बेफोरखौ लाइजौवाव लाना गपाल देवताखौ रायसंनानै फुजा खालामो।

### 7.9 सिखाव मोदाइ

बे फुजाखौ बैसाग दाननि स्नि सान खालि फालिनाय जायो फोथायनाय दंदि बैसाग दाननि बे गामिनिफ्राय बै गामियाव थांलाय-फैलाय मागिनायफोराव खायफा अपाय-अमंगल, बेराम-आजारफोरा फैनानै गामियाव हाबो। बे बेराम-आजार खालामनो हानाय मोदाइखौनो सिखाव मोदाइ होनना बुंनाय जायो। बैसाग दाननि स्नि सान खालि रायजोआ सानाव गामिनि थानसालियाव बाथौ फुजा एबा गारजा होखानानै हराव सिखाव मोदाइखौ होयो।

### 7.9.1 सिखाव मोदाइ होनाय नेम-खान्थि

गामिनि नखरफ्रोमबो बेलासेनो ओंखाम-ओनि फोमोन नांगौ। नखरनि खामानि-दामानि सान हाबनायनि सिगांनो फोजोबना लानांगौ। बेनि उनाव नखरफ्रोमबो गावबा गावनि ओंखाम ओंखिनि थफलाखौ जुना लांगोनायाव आलाइना दोननांगौ। खोमसि जानाय लोगो लोगो गामिनि हौवाफोरा ज जाना नखर नखर हाबै हाबै हस्त्रिखाव-हस्त्रिखाव दावराव खालामना ननि खुन्था, बिफां-लाइफांफोराव थखनजों बुयै बुयै सिखाव

मोदाइखौ होना लाडो। लोगोसे लांगोनायाव बोनना दोननाय थफ्लाखौ खनना लाबोफानो नांगौ। जोबथायाव गामिनि बयनिबो नखरनिफ्राय सिखाव मोदाइखौ होय होयै गामिनि दाबसे बोरि बारखोराव थुबुर जानानै फुजा होनानै लोगोआव लांफानाय दाउ-हांसोखौ बोलि होना बेयावनो सडै-खुरै जाना नवाव थाडो। गामिनि मंगलनि थाखाय बै जायगायाव मासे गोसोम दाउजो हगारना गारबोनाय जायो। मख'जाथावदि सिखाव मोदाइ होनाय समाव आयजोफोरा बाहागो लानो मोना एबा सिखाव होग्राफोरजों नुजाथिनोबो मोना।

### 7.10 खुबेर मोदाइ

बर' कसारिफोरनि गेजेराव खुबेर मोदाइनि मासिया जोबोर गोजौ। मानोना खुबेरा मोनसे गाज्जि मोदाइ। बियो जायखौनो बेखौनो जायखिजाया समावनो गाग्लोबनो हागौ। खुबेर मोदाइया गाग्लोबोब्ला जेरबायाव, बिखुडाव, उदैयाव गोब्राब बिसो जायो होनना फोथायो।

भबेन नार्जीनि बादिब्ला खुबेरा मोननै रोखोमनि - मोनसेया जाबाय गोजा खुबेर आरो गुबुन मोनसेया जाबाय गुफुर खुबेर। गोजा खुबेरखौ गुफुर खुबेरनिखुइ रागा गोसासिन होनना मिथिनो मोनो। फारसेथि सिडनी एण्डेलनि *The Kacharis* बिजाबाव मोनब्रै खुबेरनि मुं मख'नाय दं। बेफोर जाबाय आइ खुबेर, बिस खुबेर, खुबेर ब्राइ, खुबेर ब्रुइ। ओजों, टंला ओन्सोलनि खायफा गामियाव दै खुबेर (जल खुबेर) बोरिनि खुबेर (थल खुबेर), गोसोम खुबेर (काला खुबेर) धन खुबेर मुडै मोननो हायो।

दै खुबेरा दैयाव थायो। माबेबा गेदेर फुख्रि, बिलो बायदि जायगायाव बे खुबेरा थायो होनना फोथायो। बेबादि खुबेरा फुख्रिनि ना-खांखाइ गासैखौबो हख्रिबै एरसोना दोननो हायो होनना फोथायो।

बोरियाव थानाय खुबेरखौ थल खुबेर होनना बुडो। बबेबा हावासि जायगा, गोजौ हा, गेदेर फाख्रि बिफां, बान्दो बायदि जायगायाव बे खुबेरा रायजो खुडो।

धन खुबेरा जाबाय थाखा-कैसा नेग्रा खुबेर। बे खुबेरा एसे अनसुला होनना फोथायो। मानोना बिदि खुबेरा सोरबा गोरिब एबा सैथोबादि सुबुंखौ माब्लाबा थाखानि थिंख्लि सिनाथाइ होयो होनना फोथायो। खुबेरफोरा सानजोफु, मोनाबिलि आरो हर गेजेराव नागिरना जानो ओंखारो होना फोथायो आरो बै समाव सोरबाफोर मोगा-मोगि जायोब्ला खुबेरनि गाज्जि नोजोराव गोग्लैयो होनना साननाय जायो। खुबेरखौ गोजोनहोनो गोब्राब। सरासन्सायै फुजा-फाथाल होनानै खुबेरा गोजोनाब्ला गोजा, गोसोम दाउजो बोलि होनानैबो फुजा खालामनांगौ जायो।

### 7.11 हाराइ मोदाइ

हाराइ मोदाइया रोखोमसे ना-खांखाइ नेग्रा मोदाइ। बिखौ ना-खांखाइ जानानै थांना थायो होनना फोथायो। गाहाइयै हाराइ मोदाइया ना-खांखाइ थानाय जायगायाव रायजो खुडो। माब्लाबा दुब्लियाव ना सारोब्ला हाराइया हरखाबै बै नाफोरखौ जानानै फोजोबसांनो हायो होनना फोथायो। हाराइया माब्लाबा ना सारनाय जायगायाव मानसिखौ बुथारगारनोबो हागौ। बे मोदाइखौ फुजा-फाथाल खालामनाय जाया। जेराव हाराइ थायो बे जायगाखौ गोख्रैनो नागारनाया मोजां होनना फोथायनाय दं।

बेफोर मोदाइ-दावदाइनि अनगायैबो बर'फोरनि गेजेराव फोथायनायाव गोबां मोदाइ-दावदाइफोरनि मुं मोननो हायो। बेफोर जाबाय जगन्नाथ, मेरु राजा, बुरा गहाइ, माइनाव बुरै, बायदि बायदि। जगन्नाथ, मेरु-राजा आरो बुरा गहाइखौ सरासन्झायै शिब देवता होननासो बुडो। बे साथाम मोदाइखौ बर'फोरा सरासनझायै बिबार आरि बावथाइजॉनो फुजियो। माइनाउ बुरैहा बर' समाजाव मोनसे एखुथा मासि दं। माइनाव बुरैहा नखरनि माइ-माइरंखौ रैखा खालामो होनना फोथायो। माइनाव बुरैखौ इसिं ननि साहा खनायाव मोननै हानि गोजौ बिथा (आयजोनि प्रतिक) खालामना बेनि खाथियाव माहेनदोआव माइरं दोनना फुजियो। फोथायनाय दंदि इसिं नवाव दुगैया-लोबा हाबोब्ला माइनाउ बुरैया गाज्जि मोनो आरो बिनि मेगनखौ मोदै गनाय, सानाय बादि बेरामबो खालामो। अब्ला ननि बिगोमाया बिनि मुडाव बिबार आरि बावथाइ होना फुजियोब्ला माइनाउवा गोजोन्नानै मानसिखौ गोगो खालामो होनना फोथायो।

### 7.11.1 मोदाइ गारनाय

बेराम-आजार, लोमजाब्ला-साजाब्ला मोदाइ-दावदाइनि मुं लाना मोन्थोर रायनानै दैखांना दोननाय सथा एबा बावथाइफोरखौ सानसे मोजां सान नायनानै बिदाय होनाय जायो बेखौनो- 'मोदाइ गारनाय' होनना बुंनाय जायो।

कबिराजफोरनि बादिब्ला फुजा होनायनि थाखाय बिसोरो बेरामिनि जानानै मोदाइ-दावदाइनि सेराव जामिनदार जायो। बैनि थाखायनो बेरामिया बेराम हामनायनि उनाव मोदाइ-दावदाइखौ फुजा होआब्ला, कबिराजफोरा मोदाइ-मोदाइजोनि सेराव फोथायखेबस' जायो होनना साननाय जायो आरो अब्ला रावबो मोदाइ-मोदाइजोआ इयुनाव जामिनदारनि (बिनि) सतबांसाखौ फोथाया। सतबांसा होना मोदाइ-मोदाइजोखौ उनाव फुजा होयि मानसिनि नखराव उनाव रावबो कबिराजा बेराम फाहामनो सिगांबोआ। (नार्जी 1995: 224)।

### 7.11.2 मोदाइ बिदाइ-होनायनि गोनांथि जानाय जा-जगार

गिबियावनो थालिर दनानि गेदेर मोनसे नाउ बानायना लागोन गय-फाथै माइरं दालिजों बानायनाय गाज्जि; गय फाथै जरासे, आलारि बाथि मोनबा, सिन्दुर, हांसो बिदै जराथाम, फिथाइ-सामरथाइ, थालिर माखासे। थालिर दनानि बानायनाय नाउवाव मोनगु सिन्दुरनि फोथा फोनगोन। थाखा थाइसे, सिंगांनो बावना दोननाय गासैबो दाउ-हांसो, दाउदैफोरखौ होनो नांगौ। लोगोसे बेराम जानाय समाव दैखांना दोननाय जेसेबां सथा एबा फुजानि बेसादफोरखौ नाउनि खाथियाव दोनना आलारि बाथि, धुप फोजोंना अजाया गाहायाव होनाय मोन्थोरखौ रायसंलांगोन-

एहेम परमस्वर प्रभु

सोरजिगिरि बिमा सोरजिगिरि आइ

नै दिनै गासै मुवा-बेसाद  
बावनाय-थेनाय होना  
अमुखानि लोमजानाय समाव  
रायसनना दोननायखौ  
दिनै बिदाइ होनाय जाबाय  
परमस्वर प्रभु।  
मा गोनांखाइ मा होनो  
नोंनो जिखिनिखौ होगोन होनना  
बावना नै दोनदोंमोन  
दिनै गासैबो होबाय प्रभु  
एहेम परमस्वर प्रभु ... ..।

(होग्रा : उमलाउ बर' (45), सस्त्रपारा बाथाबारि)।

कबिराजा गासैबो मोन्थोरखौ रायसंनायनि उनाव सिगाडाव बावना दोननाय गासैबो बावथाइफोरखौ नाउवाव दैखांना होनो नांगौ। बावना दोननाय दाउ, फारौफोरखौ बोलि होना नै फिन अजाया मोन्थोर रायसंनानै नांगौखिनिखौ लाखिनानै आद्राखौ नाउवाव दैखांना होना आलारि बाथि फोजोंना कबिराज आरो नखरनि मानसिया थांना माबेबा दोंसे दैमायाव फोजावहरनो नांगौ। नाउवाव गोथां हांसो फिसा मासे हरफानांगौ। बिदि खालामनायनि उनाव कबिराज आरो नखरनि मानसिफोरा मोदाइनि गाज्जि नोजोरनिफ्राय रैखा मोननो हाबाय होनना गोजोन हां हगारो।

## 8. फोजोबनाय

बर' समाजाव मोदाइ-दावदाइ फोथायनायखौ बोखावजायि दरं अदेबानि अदालगुरि जिलानि सिडाव थानाय टंला हालामनि बर'फोरनियाव दिनैसिम फालिबोनाय नुनो मोनो। सोलोंथाइ बिथिडाव उन जाना थानाय बे ओन्सोलाव रायजो जानाय खावसे बर'फोरा आथिखालावबो बेराम-आजार जाब्ला मोदाइ-दावदाइनि फुजा-फाथाल खालामनानै बेरामनिफ्राय बारग'नो नाजायो। बे फोथायनायफोरा बर' समाजाव माब्लानिफ्राय जायगा मोनखो रोखायै बुंनो हाया। बेनि सोमोन्दै सिडनी एण्डेला *The Kacharis* बिजाबाव बेफोरखौ हिन्दु मोदाइ-मोदाइजोफोरनिफ्रायनो आजावनाय जादों होनना मख'दों। बेल' नडा, सिडनी एण्डेला बै बिजाबाव बर'फोरखौ animistic होननाबो बुंदों (एण्डेल 1997: 33)। बर' समाजाव सोलिनाय फोथायनाय बादिब्ला मोनसे समाव असुरफोरा सोरगो गाग्लोबनाय समाव मोदाइफोरा मुलुगाव आस्रय लादोंमोन आरो बै साननिफ्राय बिसोरो मुलुगाव नरमुनिसनि फुजा जानो थाखाय थालाडो। फारसेथिं मोनसे फोथायनायबादि भगवान आरो बेरामनि बिगोमा जेरै- जखिनी, भुत-प्रेत, मोदाइ-दावदाइखौ मानसिया

मेगनजों नुनो मोना मुलुगाव थानानै बिसोरखौ सुबुंनि सिबिनाय आजावनो जोबनो गैयि गोहो होदों। बेखायनो अबं गसाइयाबो बिसोरखौ फुजा-फाथाल खालामोब्ला गाञ्जि मोना।

बिबादिनो नुनो मोनो गुरै माहि हाग्रा-बंग्रायाव रायजो जाबोनाय जेबो बिगियाननि मोखां नुरोडै बर'फोरनि गेजेराव मोनसे समाव सोलिबोनाय फोथायनाय, खोमसि फोथायनाय, फुजा-फाथालफोरा आथिखालसिम सोलिबोगासिनो दं। खालि लेखा रोडि सुबुडाल' बे फोथायनायखौ फालिबोदों बे नडा, खायफा लेखा गोरों सुबुडाबो बे फोथायनायफोरखौ मानिना सोलिबोदों। बेखायनो नुनो मोनोदि बे फोथायनायफोरा आथिखालाव मोनसे फोथायनायल' जानानै थायालासेनो बेयो बर'फोरनि बायदि रोख्रोमनि हारिमुनि बाखिखौ दोहोनि खालामनायाव मदद खालामदों। बेखायनो बेफोरखौ फरायसंनाय आरो संरैखा खालामनायनि गोनांथि दं।

### हेफाजाब लानाय बिजाबनि फारिलाइ

बर', अनिल कुमार. 2008. *सेरजा सिफुं*. गुवाहाटी : जि. बि. डि. पाब्लिशार.

बरुवा, बिरिन्सि कुमार. 2005. *असमर लोक संस्कृति*. पानबाजार, गुवाहाटी : बीणा लाइब्रेरी.

शर्मा, हेमन्त कुमार. 1992. *असमीया साहित्यत दृस्तिपात*. पानबाजार, गुवाहाटी : बीणा लाइब्रेरी.

नार्जी, भेबन. 1995. *बडो कसारीर समाज आरो संस्कृति*, बीणा लाइब्रेरी.

ब्रह्म, बिनय कुमार. 2009. *बर नि सुबुं हारिमु*. पानबाजार, गुवाहाटी : एन.एल. पाब्लिकेशन्ज.

भट्टासार्ज, प्रमद चन्द्र .1999 सुजुथाइ. *असमर जनजाति*. पानबाजार, गुवाहाटी : लयार्ज बुक स्टल.

मोसाहारि, प्रेमानन्द. 1996. *बुरलुबुथुर हायेनाव बर नि सोदोमस्त्रि*. लांहिन तिनिआलि, कार्बि-आंलं, आसाम : प्रेमेति मोसाहारि.

गगै, लीला. 2008 सेबखांफिननाय. *असमीया लोकसाहित्यर रूपरेखा*. पानबाजार, गुवाहाटी आरो डिब्रुगड : बन'लता.

Endle, Sidney. 1997 Reprint. *The Kacharis*. New Delhi: Low prize publication.